

HITZ BITAN

ARMADA. Elkarretaratzeak gaur Leitza eta Lesakan

Berak eta Etxarri-Aranatzek Espainiako Armadari sartzea ukatu diote euren lurretan

Erredakzioa | Iruñea

Berako eta Etxarri-Aranazko udalek udal lurretan ariketak egin eta herrira sartzeko debekatu diote, formalki, Espainiako Armadari, aste honetan egindako osoko bilkuretan erabaki denez. Bi herrietan Batasuna izan zen aurreko hauteskundeetan talde bozkatuena.

Onartutako mozioa berdina da udal bietan. Aste honetan egindako ariketen bidez Espainiako Armadak herrietako lurrrak «bahitu» dituela dio idazkiak, eta soldaduak eta materiala «hirugarren munduko herritarren aurkako erasoak prestatzeko» NATOk erabiltzen dituela.

«Ez dugu gure herria gerra prestatzeko erabiltzea nahi»

«Gure herria baketsua delako, Nafarroako ipar-mendebaldeko haran eta mendiak gerra presta-

tzeko erabiltzea ez dugu nahi», dio salaketa oharrak. Bi udalek desadostasuna adierazi dute ariketa militarren aurrean, eta «okupazioaren aurka» deitutako elkarretaratzeetan parte hartzeko animatu dituzte hiritarrak.

Gaur Leitza, Lesaka eta Iruñean deituak daude protestaldiak. Leitza mendian martxa egingo da, eta Lesakan elkarretaratzea. Iruñean, eguerdian, KEM talde antimilitaristak Foruen Monumentuaren aurrean biltzeko deia egin du.

Barrenak Parlamentura eraman du gaia

Pernando Barrena parlamentariak ere, atzo egindako adierazpenean, Leitza eta Lesakan antolatutako mobilizazioetan parte hartzeko deia egin zuen. Espainiako Armadak egindako ariketek «esanahi berezia» dutela esanda, helburua presioa



JAGOBA MANTEROLA / ARGAZKI PRESS

Espainiako Armada, herenegun, Iruñean erakustaldia egiten.

egitea zela nabarmendu zuen Barrenak. «Etorri dira esatera hor daudela, zelatan, prest bortizkeria eta armak erabiltzeko edozein disidentziaren aurrean».

Barrenak berak adierazpen instituzionala aurkeztu zuen atzo Parlamentuan, Armadaren presentziaren aurka agertzeko.

EAKo Gazte Abertzaleak taldeak, era berean, haserre agertu du ariketak direla medio,

eta euskal herritarrentzat «iraina» direla adierazi du ohar baten bidez. «Espainiako batasunaren bermatzailearen indar erakustaldiaren bidez, gizartea sumindu beste helbururik ez dute».

«Euskal Herria nazkatuta dago hainbeste militarismorekin» dio oharrak, «azken 35 urteotan oinaze eta suntsipen gehien eragin duena barne, noski, ETA militararena».

Batzarreko gazteek, orobat, ohartarazi dute horrelako ariketen arriskuaz, eta gastu hauek dakartzaten diru publikoen xahutzeaz.

«Ariketa hauek ez datoz bat Nafarroako gizartearen zati handi baten sentiberatasunarekin, intsumisioarekin garbi frogatu denez». Batzarrerentzat, Armadari harrera ofizial hauek gogoetarako bidea eman behar harko lukete.

EUSKARA

Maputxeen udako unibertsitatera gonbidatu dute Kontseilua

Xabier Mendiguren Kontseiluko idazkari nagusia Txilen izango da egunotan, maputxeek gonbidatuta. Mapudungun hizkuntzaren normalizazioaren alde jarduten duen Maputxeen Nazio Batzorde Indigenak egin dio gonbita Mendigureni, lehen aldiz antolatu duten udako unibertsitatean parte har dezan. Beraz, Mendigurenek euskararen normalizazioaren alde antolatutako ekimenen eta euskararen egoeraren berri emango die han bildutakoek. Mapudungun hizkuntzak bizirik irauteko arazo larriak ditu, eta soilik ahoz egiten da transmisioa, komunitate indigenetan.

HEZKUNTZA

Bergarako UNED zentroak 25. ikasturteko inaugurazio ekitaldia egin du

Bergarako Urruneko Unibertsitateak (UNED) atzo egin zuen 2002-2003 ikasturteko inaugurazio ekitaldia, eta hasierako hitzaldia Jesus Arpal EHUKo soziologia irakasle eta UNEDeko zuzendari ohiak eskaini zuen. UNEDek 25. urteurrena betetzen du aurten, eta hori dela-eta, ekitaldi berezi gisa, margo lehiaketa eta udako ikastaroak antolatuko ditu.

KONTSUMOA

Gaur sartuko da indarrean Nafarroan ostalaritzako ordutegiak arautzen dituen dekretu berria

Nafarroako Gobernuak irailean onartutako ostalaritzaren ordutegiei buruzko foru dekretua gaur sartuko da indarrean. Irekiera orduari dagokionean, gaurtik hasita egokitu beharko dituzte ordutegiak; itxitzeko orduak egokitzeak, berriz, sei hilabeteko epea izango dute. Taberna, kafetegi eta jatetxeek 01:30ean itxi beharko dituzte ateak; dantzalekuek goizeko 06:00etan; gaztetxoentzako dantzalekuek 23:00etan; eta bingo, joko areto eta taberna bereziek 03:30ean. Ostalarien aldetik kexa gehien eragin dituen tabernei ezarri zaien ordutegia da, eta asteburuko gauetarako ordutegia zabalitzeko eskatu dute. Dekretuak aukera ematen die 03:30 arte irekitzeko, baina horretarako hainbat egokitzapen egin behar dituzte (ateak, insonorizazioa...).

AZPIEGITURAK

Hasi dira Iruñea-Logroño autobideko lehen bi zatiak eraikitzeke lanak

Atzo hasi ziren Iruñea-Lizarra-Logroño autobideko lehen bi zatiak eraikitzeke lanak. Zizur Nagusitik Garesera arteko autobide zatia, eta Gareseko saihesbidea dira eraikitzeko hasitakoak, eta 18 kilometroko luzera egiten dute, bien artean. Saihesbidea 2004ko irailean irekitzea espero dute, eta beste zatia 2005ean.

EZBEHARRA

Hiru hilabete eta 600.000 euro kostako da Santurtzin garabiak kaltetutako eraikina konpontzea

Asteazkenean Santurtziko eraikin baten gainera eroritako garabiak eragin zituen kalteak konpontzeak hiru hilabeteko lana eskatuko du, eta obrek 600.000 euroko balioa izango dute. Santurtziko alkate Javier Cruzek eman zituen atzo datu horiek. 27, 31, 33, eta 35 zenbakietako bizilagunak atzo itzuli ziren euren etxetara; baina, 29. zenbakian, lehen hiru solairuetako bizilagunak soilik itzuli ahal izango dute etxera, hala nahi izanez gero. Gai nontzekoek, hoteletan gelditu edota behin-behineko etxebizitza bat hartzearen artean aukeratu beharko dute. Ezbeharrean emakume bat hil zen eta haren senarra larri zauritu.

ABIADURA HANDIKO TRENA

'Euskal Y'-aren lan geoteknikoak geldiarazi dituzte Irunen, bi tokitan

AHT Gelditu! Elkarlanak deituta 32 lagun bildu ziren atzo Irungo Bentak-Behobia zatian egiten ari diren zundaketa geoteknikoen lanetara. Lapurditik heldutako hainbat militante ekologistak ere parte hartu zuen protestan. Protesta egileak lanak egiten ari ziren tokira iritsi zirenean, lanak bertan behera utzi zituzten langileek. Handik azterketa geoteknikoak egiten ari diren beste toki batera ere joan ziren, eta han ere lanak geldiarazi zituzten. Kasu horretan, baina, Ertzaintzaren hainbat agente agertu ziren, eta protesta egileetako batzuk identifikatu zituzten. AHT Gelditu! Elkarlanak nabarmendu zuen Irun eta Behobia artean egiten ari diren lanak «legez kanpokoak» direla, eta haien aurka salaketa bat paratu dutela jadanik.



BETELUKO UDALA

Beteluko Udalak, 2002ko azaroaren 14an egin osoko Bilkuran, Beteluko 0-3 urteko haur hezkuntzako ikastetxearen egokitzeko Klausula Partikularren Plegua onetsi zuen.

Xedea: lanak egitea

Prozedura eta esleitzeko modua: Prentsan iragarritako prozedura negoziatua

Aurrekontua: 104.892,00 euro, B.E.Z. barne.

Egitiko epea: bi hilabete

Aurkeztu beharreko agiriak: Klausula Administrativo Partikularren pleguan agertzen direnak. **Proposamenen aurkezpena:** Hamalau egun naturaleko epean, lizitazio iragarkia Nafarroako Prentsan argitaratu eta biharamunetik hasita.

Klausula Administrazioaren Plegua eta Proiektua interesatuen eskura daude, Beteluko Udalak Idazkaritzan, (Antigua Kalea, 5. Telefonoa 948-513011, 12:30etatik 14:30etara ordutegian). Eta Rubio Paperdendan (Francisco Bergamin, 10 kalea, Iruña. Telefonoa 948-237704)

Betelun, 2002ko azaroaren 14an. ALKATEA, Miguel Javier Recalde Goldaraz.

PROPOSAMEN EREDUA

Izena:

N.A.N. zenbakia:

Bizilekua:

Helbidea:

Nire izenean ez bada, ondokoa ordezkatuz:

Helbidea:

IFK:

Telefonoa:

Faxa:

Beteluko 0-3 urteko haur hezkuntzako ikastetxearen egokitzeko lanak egiteko proiektua, aurrekontua eta baldintzen pleguaren berri baitut, hitz ematen dut oso- oso egiten ditutala alpatu agiriei hertsiki lotuz, (letraz) eurotan eta, gehienez ere, (letraz) egun naturaleko epean.

(Data, sinadura eta entitatearen zigilua)